

摘藻堂四庫全書薈要

史部

欽定四庫全書薈要

史部

通鑑紀事本末卷四十二上



詳校官員外郎臣楊世綸

欽定四庫全書薈要卷八千七百七十九

史部

通鑑紀事本末卷四十二上 宋 袁樞 撰

契丹滅晉

劉知遠復汴京附

後晉高祖天福四年 成德節度使安重榮出於行伍性

粗率恃勇驕暴每謂人曰今世天子兵彊馬壯則為之

耳府廨有幡竿高數十尺嘗挾弓矢謂左右曰我能中  
竿上龍首者必有天命一發中之以是益自負帝之遣  
重榮代秘瓊也戒之曰瓊不受代當別除汝一鎮勿以

力取恐為患滋深重榮由是以帝為怯謂人曰祕瓊匹夫耳天子尚畏之況我以將相之重士馬之衆乎每所奏請多踰分為執政所可否意憤憤不快乃聚亡命市戰馬有飛揚之志帝知之義武節度使皇甫遇與重榮姻家七月徙遇為昭義節度使

五年 初帝割鴈門之北以賂契丹由是吐谷渾皆屬契丹苦其貪虐思歸中國成德節度使安重榮復誘之於是吐谷渾帥部落千餘帳自五臺來犇契丹大怒遣

使讓帝以招納叛人

六年春正月丙寅帝遣供奉官張澄將兵二千索吐谷  
渾在并鎮忻代四州山谷者逐之使還故土 成德節

度使安重榮耻臣契丹見契丹使者必箕踞慢罵使過  
其境或潛遣人殺之契丹以讓帝帝為之遜謝六月戊  
午重榮執契丹使伊喇遣輕騎掠幽州南境軍於博野  
上表稱吐谷渾兩突厥渾契苾沙陀各帥部衆歸附党  
項等亦遣使納契丹告身職牒言為虜所陵暴又言自

二月以來令各具精甲壯馬將以上秋南寇恐天命不佑與之俱滅願自備十萬衆與晉共擊契丹又朔州節度副使趙崇已逐契丹節度使劉山求歸命朝廷臣相繼以聞陛下屢勅臣承奉契丹勿自起釁端其如天道人心難以違拒機不可失時不再來諸節度使沒於虜庭者皆延頸企踵以待王師良可哀閔願早決計表數千言大抵斥帝父事契丹竭中國以媚無厭之虜又以此意為書遺朝貴及移藩鎮云已勒兵必與契丹決戰

帝以重榮方握彊兵不能制甚患之時鄴都留守侍衛  
馬步都指揮使劉知遠在大梁秦寧節度使桑維翰知  
重榮已蓄姦謀又慮朝廷重違其意密上疏曰陛下免  
於晉陽之難而有天下皆契丹之功也不可負之今重  
榮恃勇輕敵吐谷渾假手報仇皆非國家之利不可聽  
也臣竊觀契丹數年以來士馬精彊吞噬四鄰戰必勝  
攻必取割中國之土地收中國之器械其君智勇過人  
其臣上下輯睦牛馬蕃息國無天災此未可與為敵也

且中國新敗士氣彫沮以當契丹乘勝之威其勢相去甚遠又和親既絕則當發兵守塞兵少則不足以待寇兵多則饋運無以繼之我出則彼歸我歸則彼至臣恐禁衛之士疲於奔命鎮定之地無復遺民今天下粗安瘡痍未復府庫虛竭蒸民困弊靜而守之猶懼不濟其可妄動乎契丹與國家恩義非輕信誓甚著彼無間隙而自啓釁端就使克之後患愈重萬一不克大事去矣議者以歲輸繒帛謂之耗蠹有所卑遜謂之屈辱殊不



知兵連而不休禍結而不解財力將匱耗蠹孰甚焉用  
兵則武吏功臣過求姑息邊藩遠郡得以驕矜下陵上  
替屈辱孰大焉臣願陛下訓農習戰養兵息民俟國無  
內憂民有餘力然後觀釁而動則動必有成矣又鄴都  
富盛國家藩屏今主帥赴闕軍府無人臣竊思慢藏誨  
盜之言勇夫重閉之義乞陛下畧加巡幸以杜姦謀帝  
謂使者曰朕比日以來煩懣不決今見卿奏如醉醒矣  
卿勿以為憂

秋七月帝憂安重榮跋扈已已以劉知

遠為北京留守河東節度使 八月帝以詔諭安重榮  
曰爾身為大臣家有老母忿不思難棄君與親吾因契  
丹得天下爾因吾致富貴吾不敢忘德爾乃忘之何邪  
今吾以天下臣之爾欲以一鎮抗之不亦難乎宜審思  
之無取後悔重榮得詔愈驕聞山南東道節度使安崇  
進有異志陰遣使與之通謀 九月帝以安重榮殺契  
丹使者恐其犯塞乙亥遣安國節度使楊彥珣使於契  
丹彥珣至其帳契丹主責以使者死狀彥珣曰譬如人

家有惡子父母所不能制將如之何契丹主怒乃解  
劉知遠遣親將郭威以詔旨說吐谷渾酋長白承福令  
去安重榮歸朝廷許以節鉞威還謂知遠曰虜惟利是  
嗜安鐵胡止以袍袴賂之今欲其來莫若重賂乃可致  
耳知遠從之且使謂承福曰朝廷已割爾曹隸契丹爾  
曹當自安部落今乃南來助安重榮為逆重榮已為天  
下所棄朝夕敗亡爾曹宜早從化勿俟臨之以兵南北  
無歸悔無及矣承福懼冬十月帥其衆歸於知遠知遠

處之太原東山及嵐石之間表承福領大同節度使收其精騎以隸麾下始安重榮移檄諸道云與吐谷渾韃靼契苾同起兵既而承福降知遠韃靼契苾亦莫之赴重榮勢大沮冬十二月安重榮聞安從進舉兵反謀遂決大集境內饑民衆至數萬南向鄴都聲言入朝初重榮與深州人趙彥之俱為散指揮使相得歡甚重榮鎮成德彥之自關西歸之重榮待遇甚厚使彥之招募黨衆然心實忌之及舉兵止用為排陳使彥之恨之帝

聞重榮反壬辰遣護聖等馬步三十九指揮擊之以天  
平節度使杜重威為招討使安國節度使馬全節副之  
前永清節度使王周為馬步都虞候 戊戌杜重威與  
安重榮遇於宗城西南重榮為偃月陳官軍再擊之不  
動重威懼欲退指揮使宛丘王重胤曰兵家忌退鎮之  
精兵盡在中軍請公分銳士擊其左右翼重胤為公以  
契丹直衝其中軍彼必狼狽重威從之鎮人陳稍却趙  
彥之卷旗策馬來降彥之以銀飾鎧冑及鞍勒官軍殺

而分之重榮聞彥之叛大懼退匿於輜重中官軍從而乘之鎮人大潰斬首萬五千級重榮收餘衆走保宗城官軍進攻夜分拔之重榮以十餘騎走還鎮州嬰城自守會天寒鎮人戰及凍死者二萬餘人契丹聞重榮反乃聽楊彥珣還

七年春正月丁巳鎮州牙將自西郭水碾門導官軍入城殺守陴民二萬人執安重榮斬之杜重威殺導者自以為功庚申重榮首至鄴都帝命漆之函送契丹夏

四月契丹以晉招納吐谷渾遣使來讓帝憂悵不知為計五月己亥始有疾 帝寢疾一旦馮道獨對帝命幼子重睿出拜之又令宦者抱重睿置道懷中其意蓋欲道輔立之六月乙丑帝殂道與天平節度使侍衛馬步都虞候景延廣議以國家多難宜立長君乃奏廣晉尹齊王重貴為嗣是日齊王即皇帝位延廣以為己功始用事禁都下人毋得偶語初高祖疾亟有旨召河東節度使劉知遠入輔政齊王寢之知遠由是怨齊王 秋

七月癸卯加景延廣同平章事兼侍衛馬步都指揮使  
冬十一月庚寅葬聖文章武明德孝皇帝於顯陵廟  
號高祖 帝之初即位也大臣議奉表稱臣告哀於契  
丹景延廣請致書稱孫而不稱臣李崧曰屈身以為社  
稷何耻之有陛下如此他日必躬擐甲胄與契丹戰於  
時悔無益矣延廣固爭馮道依違其間帝卒從延廣議  
契丹大怒遣使來責讓且言何得不先承稟遽即帝位  
延廣復以不遜語荅之契丹盧龍節度使趙延壽欲代



晉帝中國屢說契丹擊晉契丹主頗然之

齊王天福八年帝聞契丹將入寇二月己未發鄴都乙丑至  
東京然猶與契丹問遺相往來無虛月 初河陽牙將喬  
榮從趙延壽入契丹契丹以為回圖使往來販易於晉置  
邸大梁及契丹與晉有隙景延廣說帝囚榮於獄悉取邸  
中之貨凡契丹之人販易在晉境者皆殺之奪其貨大  
臣皆言契丹有大功於晉不可負戊子釋榮慰賜而歸  
之榮辭延廣延廣大言曰歸語而主先帝為北朝所立

故奉表稱臣今上乃中國所立所以降志於北朝者正以不敢忘先帝盟約故耳為隣稱孫足矣無稱臣之理北朝皇帝勿信趙延壽誑誘輕侮中國中國士馬爾所目覩翁怒則來戰孫有十萬橫磨劒足以相待他日為孫所敗取笑天下毋悔也榮自以亡失貨財恐歸獲罪且欲為異時據驗乃曰公所言頗多懼有遺忘願記之紙墨延廣命吏書其語以授之榮具以白契丹主契丹主大怒入寇之志始決晉使如契丹者皆繫之幽州不

得見桑維翰屢請遜辭以謝契丹每為延廣所沮帝以  
延廣為有定策功故寵冠羣臣又總宿衛兵故大臣莫  
能與之爭河東節度使劉知遠知延廣必致寇而畏其  
方用事不敢言但益募兵奏置興捷武節等十餘軍以  
備契丹楊光遠之叛也密告契丹以晉主負德違盟境  
內大饑公私困竭乘此際攻之一舉可取趙延壽亦勸  
之契丹主乃集山後及盧龍兵合五萬人使延壽將之  
委延壽經畧中國曰若得之當立汝為帝又常指延壽

謂晉人曰此汝主也延壽信之由是為契丹盡力畫取中國之策朝廷頗聞其謀丙辰遣使城南樂及德清軍徵近道兵以備之

開運元年春正月乙亥邊藩馳告契丹前鋒將趙延壽趙延照將兵五萬入寇逼貝州延照思溫之子也先是朝廷以貝州水陸要衝多聚芻粟為大軍數年之儲以備契丹軍校邵珂性凶悖永清節度使王令溫黜之珂怨望密遣人亡入契丹言貝州粟多而兵弱易取也會

令溫入朝執政以前復州防禦使吳縯權知州事縯既至推誠撫士會契丹入寇縯書生無爪牙珂自請願效死縯使將兵守南門縯自守東門契丹主自攻貝州縯悉力拒之燒其攻具殆盡已邈契丹復攻城珂引契丹自南門入縯赴井死契丹遂陷貝州所殺且萬人庚辰以歸德節度使高行周為北面行營都部署以河陽節度使符彥卿為馬軍左廂排陳使以右神武統軍皇甫遇為馬軍右廂排陳使以陝府節度使王周為步軍左

廂排陳使以左羽林將軍潘環為步軍右廂排陳使

太原奏契丹入鴈門關恒邢滄皆奏契丹入寇 成德

節度使杜威遣幕僚曹光裔往說楊光遠光遠遣光裔

入奏朝廷遣使與光裔往復慰諭之

事見范  
楊之叛

帝遣使

持書遺契丹契丹已屯鄴都不得通而返壬午以侍衛

馬步都指揮使景延廣為御營使前靜難節度使李周

為東京留守是日高行周以前軍先發時用兵方略號

令皆出延廣宰相以下皆無所預延廣乘勢使氣陵侮

諸將雖天子亦不能制乙酉帝發東京丁亥滑州奏契  
丹至黎陽戊子帝至澶州契丹主乚元城趙延壽乚南  
樂以延壽為魏博節度使封魏王契丹寇太原劉知遠  
與白承福合兵二萬擊之甲午以知遠為幽州道行營  
招討使杜威為副使馬全節為都虞候丙申遣右武衛  
上將軍張彥澤等將兵拒契丹於黎陽帝復遣譯者  
孟守忠致書於契丹求修舊好契丹主復書曰已成之  
勢不可改也辛丑太原奏破契丹偉王於秀容斬首三

千級契丹自鴉鳴谷遁去 天平節度副使知鄆州顏

衍遣觀察判官竇儀奏博州刺史周儒以城降契丹又

與楊光遠通使往還引契丹自馬家口濟河擒左武衛

將軍蔡行遇儀謂景延廣曰虜若濟河與光遠合則河

南危矣延廣然之儀薊州人也 二月甲辰朔命前保義

節度使石贇守麻家口前威勝節度使何重建守楊劉

鎮護聖都指揮使白再榮守馬家口西京留守安彥威

守河陽未幾周儒引契丹將滿達自馬家口濟河營於



東岸攻鄆州北津以應楊光遠滿達契丹主之從弟也  
乙巳遣侍衛馬軍都指揮使義成節度使李守貞神武  
統軍皇甫遇陳州防禦使梁漢璋懷州刺史薛懷讓將  
兵萬人緣河水陸俱進守貞河陽漢璋應州懷讓太原  
人也丙午契丹圍高行周符彥卿及先鋒指揮使石公  
霸於戚城先是景延廣令諸將分地而守無得相救行  
周等告急延廣徐白帝帝自將救之契丹解去三將泣  
訴救兵之緩幾不免戊申李守貞等至馬家口契丹遣

步卒萬人築壘散騎兵於其外餘兵數萬屯河西船數十艘度兵未已晉兵薄之契丹騎兵退走晉兵進攻其壘拔之契丹大敗乘馬赴河溺死者數千人俘斬亦數千人河西之兵慟哭而去由是不敢復東 辛亥定難節度使李彝殷奏將兵四萬自麟州濟河侵契丹之境士子以彝殷為契丹西南面招討使初契丹主得貝州博州皆撫慰其人或拜官賜服章及敗於戚城及馬家口忿恚所得民皆殺之得軍士燔炙之由是晉人憤怒

戮力爭奮楊光遠將青州兵欲西會契丹戊午詔石贊  
分兵屯鄆州以備之詔劉知遠將部兵自土門出恒州  
擊契丹又詔會杜威馬全節於邢州知遠引兵屯樂平  
不進契丹偽棄元城去伏精騎於古頓丘城以俟晉  
軍與恒定之兵合而擊之鄴都留守張從恩屢奏虜已  
遁亡大軍欲進追之會霖雨而止契丹設伏旬日人馬  
饑疲趙延壽曰晉軍悉在河上畏我鋒銳必不敢前不  
如即其城下四合攻之奪其浮梁則天下定矣契丹主

從之三月癸酉朔自將兵十餘萬陳於澶州城北東西橫掩城之兩隅登城望之不見其際高行周前軍在戚城之南與契丹戰自午至晡互有勝負契丹主以精兵當中軍而來帝亦出陳以待之契丹主望見晉軍之盛謂左右曰楊光遠言晉兵半已餒死今何多也以精騎左右略陳晉軍不動萬弩齊發飛矢蔽地契丹稍却又攻晉陳之東偏不克苦戰至暮兩軍死者不可勝數昏後契丹引去營於三十里之外乙亥契丹主帳中小校

竊其馬亡來云契丹主已傳木書收軍北去景延廣疑其詐閉壁不敢追契丹主自澶州北分為兩軍一出

滄德一出深冀而歸所過焚掠方廣千里民物殆盡留趙延照為貝州留後滿達陷德州擒刺史尹居璠丁亥詔太原恒定兵各還本鎮辛卯馬全節攻契丹泰州拔之敕天下籍鄉兵每七戶共出兵械資一卒

夏四月丁未緣河巡檢使梁進以鄉社兵復取德州己酉命歸德節度使高行周保義節度使王周留鎮澶州

庚戌帝發澶州甲寅至大梁侍衛馬步都指揮使天平  
節度使同平章事景延廣既為上下所惡帝亦憚其不  
遜難制桑維翰引其不救戚城之罪辛酉加延廣兼侍  
中出為西京留守以歸德節度使兼侍中高行周為侍  
衛馬步都指揮使延廣鬱鬱不得志見契丹彊盛始憂  
國破身危遂日夜縱酒朝廷因契丹入寇國用愈竭復  
遣使者三十六人分道括率民財各封劍以授之使者  
多從吏卒攜鎖械刀杖入民家小大驚懼求死無地州

縣吏復因緣為姦河南府出緡錢二十萬景延廣率三十七萬留守判官河南盧億言於延廣曰公位兼將相富貴極矣今國家不幸府庫空竭不得已取於民公何忍復因而求利為子孫之累乎延廣慚而止先是詔以楊光遠叛命兗州脩守備泰寧節度使安審信以治樓堞為名率民財以實私藏大理卿張仁愿為括率使至兗州賦緡錢十萬值審信不在拘其守藏吏指取錢一困已滿其數丙戌詔諸州所籍鄉兵號武定軍凡得

七萬餘人時兵荒之餘復有此擾民不聊生 丁亥鄴

都留守張從恩上言趙延照雖據貝州麾下兵皆久客  
思歸宜速進軍攻之詔以從恩為貝州行營都部署督  
諸將擊之辛卯從恩奏趙延照縱火大掠棄城而遁屯  
於瀛莫阻水自固 六月或謂帝曰陛下欲禦北方安  
天下非桑維翰不可丙午復置樞密院以維翰為中書  
令兼樞密使事無大小悉以委之數月之間朝廷差治  
初高祖割北邊之地以賂契丹由是府州刺史折從



遠亦北屬契丹欲盡徙河西之民以實遼東州人大恐從遠因保險拒之及帝與契丹絕遣使諭從遠使攻契丹從遠引兵深入拔十餘寨戊午以從遠為府州團練使從遠雲州人也秋八月辛丑朔以河東節度使劉知遠為北面行營都統順國節度使杜威為都招討使督十三節度以備契丹桑維翰兩秉朝政出楊光遠景延廣於外至是一制指揮節度使十五人無敢違者時人服其膽略契丹之入寇也帝再命劉知遠會兵山東

皆後期不至帝疑之謂所親曰太原殊不助朕必有異  
圖果有分何不速為之至是雖為都統而實無臨制之  
權密謀大計皆不得預知遠亦知見踈但慎事自守而  
已郭威見知遠有憂色謂知遠曰河東山河險固風俗  
尚武士多戰馬靜則勤稼穡動則習軍旅此霸王之資  
也何憂乎十二月契丹復大舉入寇盧龍節度使趙延  
壽引兵先進契丹前鋒至邢州順國節度使杜威遣使  
問道告急帝欲自將拒之會有疾命天平節度使張從

恩鄴都留守馬全節護國節度使安審琦會諸道兵屯  
邢州武寧節度使趙在禮屯鄴都契丹主以大兵繼至  
建牙於元氏朝廷憚契丹之威詔從恩等引兵稍却於  
是諸軍恐懼無復部伍委棄器甲所過焚掠比至相州  
不復能整

二年春正月詔趙在禮還屯澶州馬全節還鄴都又遣  
右神武統軍張彥澤屯黎陽西京留守景延廣自滑州  
引兵守胡梁渡庚子張從恩奏契丹逼邢州詔滑州鄴

都復進軍拒之義成節度使皇甫遇將兵趣邢州契丹  
寇邢洺磁三州殺掠殆盡入鄴都境壬子張從恩馬全  
節安審琦悉以行營兵數萬陳於相州安陽水之南皇  
甫遇與濮州刺史慕容彥超將數千騎前覘契丹至鄴  
縣將渡漳水遇契丹數萬遇等且戰且却至榆林店契  
丹大至二將謀曰吾屬今走死無遺矣乃止布陳自午  
至未力戰百餘合相殺傷甚衆遇馬斃因步戰其僕杜  
知敏以所乘馬授之遇乘馬復戰久之稍解顧知敏已

為契丹所擒遇曰知敏義士不可棄也與彥超躍馬入契丹陳取知敏而還俄而契丹繼出新兵來戰二將曰吾屬勢不可走以死報國耳日且暮安陽諸將恠覘兵不還安審琦曰皇甫太師寂無聲問必為虜所困語未半有一騎白遇等為虜數萬所圍審琦即引騎兵出將救之張從恩曰此言未足信必若虜衆猥至盡吾軍恐未足以當之公往何益審琦曰成敗天也萬一不濟當共受之借使彼不南來坐失皇甫太師吾屬何顏以見

天子遂踰水而進契丹望見塵起即解去遇等乃得還與諸將俱歸相州軍中皆服二將之勇彥超本吐谷渾也與劉知遠同母契丹亦引軍退其衆自相驚曰晉軍悉至矣時契丹主在邯鄲聞之即時北遁不再宿至鼓城是夕張從恩等議曰契丹傾國而來吾兵不多城中糧不支一旬萬一有姦人往告吾虛實虜悉衆圍我死無日矣不若引軍就黎陽倉南倚大河以拒之可以萬全議未決從恩引兵先發諸軍繼之擾亂失亡復如發

邢州之時從恩等留步兵五百守安陽橋夜四鼓知相  
州事符彥倫謂將佐曰此夕紛紜人無固志五百弊卒  
安能守橋即召入乘城為備至曙望之契丹數萬騎已  
陳於安陽水北彥倫命城上揚旌鼓譟約束契丹不測  
日加辰趙延壽與契丹特哩袞帥眾踰水環相州而南詔  
右神武統軍張彥澤將兵趣相州延壽等至湯陰聞之  
甲寅引還馬全節等擁大軍在黎陽不敢追延壽悉陳  
甲騎於相州城下若將攻城狀符彥倫曰此虜將走耳

出甲卒五百陳於城北以待之契丹果引去以天平節度使張從恩權東京留守庚申振武節度使折從遠擊契丹圍勝州遂攻朔州帝疾小愈河北相繼告急帝曰此非安寢之時乃部分諸將為行計北面副招討使馬全節等奏據降者言虜衆不多宜乘其散歸種落大舉徑襲幽州帝以為然徵兵諸道壬戌下詔親征乙丑帝發大梁二月壬辰朔帝至滑州壬申命安審琦屯鄴都甲戌帝發滑州乙亥至澶州己卯馬全節等諸軍



以次北上劉知遠聞之曰中國疲弊自守恐不足乃橫挑彊胡勝之猶有後患況不勝乎契丹自恒州還以羸兵驅牛羊過祁州城下刺史下邳沈斌出兵擊之契丹以精騎奪其門州兵不得還趙延壽知城中無餘兵引契丹急攻之斌在上延壽語曰沈使君吾之故人擇禍莫若輕何不早降斌曰侍中父子失計陷身北庭恐帥他族以殘父母之邦不自愧耻更有驕色何哉沈斌弓折矢盡寧為國家死耳終不效公所為明日城陷斌自

殺 丙戌詔北面行營都招討使杜威以本道兵會馬

全節等進軍 端明殿學士戶部侍郎馮玉宣徽北院

使權侍衛馬步都虞候太原李彥韜皆挾恩用事惡中

書令桑維翰數毀之帝欲罷維翰政事李崧劉昫固諫

而止維翰請以玉為樞密副使玉殊不平丙申中旨以

玉為戶部尚書樞密使以分維翰之權彥韜少事閭寶為

僕夫後隸高祖帳下高祖自太原南下留彥韜侍帝為

腹心由是有寵性纖巧與嬖幸相結以蔽帝耳目帝委

信之至於升黜將相亦得預議常謂人曰吾不知朝廷設文官何所用且欲澄汰徐當盡去之初高祖置德

清軍於故澶州城及契丹入寇澶州鄴都之間城戍俱陷議者以澶州鄴都相去百五十里宜於中塗築城以應接南北從之三月戊戌更築德清軍城合德清南樂之民以實之乙巳杜威等諸軍會於定州以供奉官

蕭處鈞權知祁州事庚戌諸軍攻契丹泰州刺史晉廷謙舉州降甲寅取滿城獲契丹酋長穆蘭及其兵二千

人乙卯取遂城趙延壽部曲有降者言契丹主還至虎  
北口聞晉取泰州復擁衆南向約八萬餘騎計來夕當  
至宜速為備杜威等懼丙辰退保泰州戊午契丹至泰  
州己未晉軍南行契丹踵之晉軍至陽城庚申契丹大  
至晉軍與戰逐北十餘里契丹踰白溝而去壬戌晉軍  
結陳而南敵騎四合如山諸軍力戰拒之是日纔行十  
餘里人馬飢乏癸亥晉軍至白團衛村埋鹿角為行寨  
契丹圍之數重奇兵出寨後斷糧道是日東北風大起

破屋折樹營中掘井方及水輒崩士卒取其泥帛絞而飲之人馬俱渴至曙風尤甚契丹主坐奚車中令其衆曰晉軍止此耳當盡擒之然後南取大梁命鐵鷄四面下馬拔鹿角而入奮短兵以擊晉軍又順風縱火揚塵以助其勢軍士皆憤怒大呼曰都招討使何不用兵令士卒徒死諸將請出戰杜威曰俟風稍緩徐觀可否馬步都監李守貞曰彼衆我寡風沙之內莫測多少惟力鬪者勝此風乃助我也若俟風止吾屬無類矣即呼曰

諸軍齊擊賊又謂威曰令公善守禦守貞以中軍決死  
矣馬軍左廂都排陳使張彥澤召諸將問計皆曰虜得  
風勢宜俟風回與戰彥澤亦以為然諸將退馬軍右廂  
副排陳使太原藥元福獨留謂彥澤曰今軍中饑渴已  
甚若俟風回吾屬已為虜矣敵謂我不能逆風以戰宜  
出其不意急擊之此兵之詭道也馬步左右廂都排陳  
使符彥卿曰與其束手就擒曷若以身殉國乃與彥澤  
元福及左廂都排陳使皇甫遇引精騎出西門擊之諸

將繼至契丹却數百步彥卿等謂守貞曰且曳隊往來  
乎直前奮擊以勝為度乎守貞曰事勢如此安可回鑾  
宜長驅取勝耳彥卿等躍馬而去風勢益甚昏晦如夜  
彥卿等擁萬餘騎橫擊契丹呼聲動天地契丹大敗而  
走勢如崩山李守貞亦令步兵盡拔鹿角出鬪步騎俱  
進逐北二十餘里鐵鷄既下馬蒼黃不能復上皆委棄  
馬及鎧仗蔽地契丹散卒至陽城東南水上稍復布列  
杜威曰賊已破膽不宜更令成列遣精騎擊之皆渡水

去契丹主乘奚車走十餘里追兵急獲一橐駝乘之而走諸將請急追之杜威揚言曰逢賊幸不死更索衣囊耶李守貞曰兩日人馬渴甚今得水飲之皆足重難以追寇不若全軍而還乃退保定州契丹主至幽州散兵稍集以軍失利杖其酋長各數百唯趙延壽得免乙丑諸軍自定州引歸詔以泰州隸定州夏四月辛巳帝發澶州甲申還大梁順國節度使杜威久鎮恒州性貪殘自恃貴戚多不法每以備邊為名斂吏民錢帛以充私



藏富室有珍貨或名姝駿馬皆奪取之或誣以罪殺之  
籍沒其家又畏懦過甚每契丹數十騎入境威已閉門  
登陴或數騎驅所掠華人千百過城下威但瞋目延頸  
望之無意邀取由是虜無所忌憚屬城多為所屠威竟  
不出一卒救之千里之間暴骨如莽村落殆盡威見所  
部殘弊為衆所怨又畏契丹之彊累表請入朝帝不許  
威不俟報遽委鎮入朝朝廷聞之驚駭桑維翰言於帝  
曰威固違朝命擅離邊鎮居常憑恃勲親邀求姑息及

疆場多事曾無守禦之意宜因此時廢之庶無後患帝  
不悅維翰曰陛下不忍廢之宜授以近京小鎮勿復委  
以雄藩帝曰威朕之密親必無異志但宋國長公主切  
欲相見耳公勿以為疑維翰自是不敢復言國事以足  
疾辭位五月丙辰威至大梁 己未杜威獻部曲步騎  
合四千人并鎧仗庚申又獻粟十萬斛芻二十萬束云  
皆在本道帝以其所獻騎兵隸扈聖步兵隸護國威復  
請以為牙隊而稟賜皆仰縣官威又令公主白帝求天

雄節鉞帝許之 六月癸酉以杜威為天雄節度使

契丹連歲入寇中國疲於奔命邊民塗地契丹人畜亦多死國人厭苦之舒嚕太后謂契丹主曰使漢人為我主可乎曰不可太后曰然則汝何故欲為漢主曰石氏負恩不可容太后曰汝今雖得漢地不能居也萬一蹉跌悔何所及又謂其羣下曰漢兒何得一向眠自古但聞漢和蕃不聞蕃和漢漢兒果能回意我亦何惜與和桑維翰屢勸帝復請和於契丹以紓國患帝假開封軍

將張暉供奉官使奉表稱臣詣契丹卑辭謝過契丹主曰使景延廣桑維翰自來仍割鎮定兩道隸我則可和朝廷以契丹語忽謂其無和意乃止及契丹主入大梁謂李崧等曰鄉使晉使再來則南北不戰矣 秋八月

丙寅右僕射兼中書侍郎同平章事和凝罷守本官加樞密使戶部尚書馮玉中書侍郎同平章事事無大小悉以委之帝自陽城之捷謂天下無虞驕侈益甚四方貢獻珍奇皆歸內府多造器玩廣宮室崇飾後庭近朝

莫之及作織錦樓以織地衣用織工數百期年乃成又  
賞賜優伶無度桑維翰諫曰鄉者陛下親禦北寇戰士  
重傷者賞不過帛數端今優人一談一笑稱旨往往賜  
束帛萬錢錦袍銀帶彼戰士見之能不缺望曰我曹冒  
白刃絕筋折骨曾不如一談一笑之功乎如此則士卒  
解體陛下誰與衛社稷乎帝不聽馮玉每善承迎帝意  
由是益有寵嘗有疾在家帝謂諸宰相曰自刺史以上  
俟馮玉出乃得除其倚任如此玉乘勢弄權四方賂遺

輻湊其門由是朝政益壞 九月戊申置威信軍於曹

州遣侍衛馬步都指揮使李守貞戍澶州 乙卯遣彰

德節度使張彥澤戍恒州 初帝疾未平會正旦樞密使

中書令桑維翰遣女僕入宮起居太后因問皇弟睿近

讀書否帝聞之以告馮玉玉因譖維翰有廢立之志帝

疑之李守貞素惡維翰馮玉李彥韜與守貞合謀排之

以中書令行開封尹趙瑩柔而易制共薦以代維翰十

二月罷維翰政事為開封尹以瑩為中書令李崧為樞

密使守侍中維翰遂稱足疾希復朝謁杜絕賓客或謂馮玉曰桑維翰元老今既解其樞務縱不留之相位猶當優以大藩柰何使之尹京親猥細之務乎玉曰恐其反耳曰儒生安能反玉曰縱不自反恐其教人耳

三年定州西北二百里有狼山土人築堡於山上以避胡寇堡中有佛舍尼孫深意居之以妖術惑衆言事頗驗遠近信奉之中山人孫方簡及弟行友自言深意之姪不飲酒食肉事深意甚謹深意卒方簡嗣行其術稱

深意坐化嚴飾事之如生其徒日滋會晉與契丹絕好  
北邊賦役繁重寇盜充斥民不安其業方簡行友因帥  
鄉里豪健者據寺為寨以自保契丹入寇方簡帥眾邀  
擊頗獲其甲兵牛馬軍資人挈家徃依之者益衆久之  
至千餘家遂為羣盜懼為吏所討乃歸款朝廷朝廷亦  
資其禦寇署東北招討指揮使方簡時入契丹境抄掠  
多所殺獲既而邀求不已朝廷小不副其意則舉寨降  
於契丹請為鄉道以入寇時河北大饑民餓死者所在



以萬數充鄆滄貝之間盜賊蜂起吏不能禁天雄節度使杜威遣元隨軍將劉延翰市馬於邊方簡執之獻於契丹延翰逃歸六月壬戌至大梁言方簡欲乘中國凶饑引契丹入寇宜為之備乙丑定州言契丹勒兵壓境詔以天平節度使侍衛馬步都指揮使李守貞為北面行營都部署義成節度使皇甫遇副之彰德節度使張彥澤充馬軍都指揮使兼都虞候義武節度使蓊人李殷充步軍都指揮使兼都排陳使遣護聖指揮使臨

清王彥超太原白延遇以部兵十營詣邢州時馬軍都  
指揮使鎮安節度使李彥韜方用事視守貞蔑如也守  
貞在外所為事無大小彥韜必知之守貞外雖敬奉而  
內恨之 秋七月有自幽州來者言趙延壽有意歸國  
樞密使李崧馮玉信之命天雄節度使杜威致書於延  
壽具述朝旨啖以厚利洺州軍將趙行實嘗事延壽遣  
齎書潛往遺之延壽復書言久處異域思歸中國乞發  
大軍應接拔身南去辭旨懇密朝廷欣然復遣行實詣

延壽與為期約 八月李守貞言與契丹千餘騎遇於  
長城北轉鬪四十里斬其酋帥轄哩擁餘衆入水溺死  
者甚衆 丁卯詔李守貞還屯澶州 帝既與契丹絕  
好數召吐谷渾酋長白承福入朝宴賜甚厚承福從帝  
與契丹戰澶州又與張從恩戍滑州屬歲大熱遣其部  
落還太原畜牧於嵐石之境部落多犯法劉知遠無所  
縱捨部落知朝廷微弱且畏知遠之嚴謀相與遁歸故  
地有白可久者位亞承福帥所部先亡歸契丹契丹用

為雲州觀察使以誘承福知遠與郭威謀曰今天下多  
事置此屬於太原乃腹心之患也不如去之承福家甚  
富飼馬用銀槽威勸知遠誅之收其貨以贍軍知遠密  
表吐谷渾反覆難保請遷於內地帝遣使發其部落千  
九百人分置河陽及諸州知遠遣威誘承福等入居太  
原城中因誣承福等五族謀叛以兵圍而殺之合四百  
口籍沒其家貲詔褒賞之吐谷渾由是遂微 九月契  
丹三萬寇河東壬辰劉知遠敗之於楊武谷斬首七千

級 張彥澤奏敗契丹於定州北又敗之於泰州斬首  
二千級 契丹使瀛州刺史劉延祚遺樂壽監軍王巒

書請舉城內附且云城中契丹兵不滿千人乞朝廷發  
輕兵襲之已為內應又今秋多雨自瓦橋以北積水無  
際契丹主已歸牙帳雖聞關南有變地遠阻水不能救  
也巒與天雄節度使兼中書令杜威屢奏瀛莫乘此可  
取深州刺史慕容遷獻瀛莫圖馮玉李崧信以為然欲  
發大兵迎趙延壽及延祚先是侍衛馬步都指揮使天

平節度使李守貞數將兵過廣晉杜威厚待之贈金帛  
甲兵動以萬計守貞由是與威親善守貞入朝帝勞之  
曰聞卿為將嘗費私財以賞戰士對曰此皆杜威盡忠  
於國以金帛資臣臣安敢掠有其美因言陛下若他日  
用兵臣願與威戮力以清沙漠帝由是亦賢之及將北  
征帝與馮玉李崧議以威為元帥守貞副之趙瑩私謂  
馮李曰杜令國戚貴為將相而所欲未厭心常慊慊豈  
可復假以兵權必若有事北方不若止任守貞為愈也

不從冬十月辛未以威為北面行營都招討使以守貞  
為兵馬都監泰寧節度使安審琦為左右廂都指揮使  
武寧節度使符彥卿為馬軍左廂都指揮使義成節度  
使皇甫遇為馬軍右廂都指揮使永清節度使梁漢璋  
為馬軍都排陳使前威勝節度使宋彥筠為步軍左廂  
都指揮使奉國左廂都指揮使王饒為步軍右廂都指  
揮使洺州團練使薛懷讓為先鋒都指揮使仍下勅榜  
曰專發大軍往平黠寇先收瀛莫安定關南次復幽燕蕩

平塞北又曰有能擒獲北主者除上鎮節度使賞錢萬緡絹萬足銀萬兩時自六月積雨至是未止軍行及饋運者甚艱苦杜威李守貞會兵於廣晉而北行威屢使公主入奏請益兵曰今深入敵境必資衆力由是禁軍皆在其麾下而宿衛空虛十一月丁酉以李守貞權知幽州行府事己亥杜威等至瀛州城門洞啓寂若無人威等不敢進聞契丹將噶瑪哈先已引兵潛出威遣梁漢璋將二千騎追之漢璋遇契丹於南陽務敗死威



等聞之引兵而南時東城等數縣請降威等焚其廬舍掠其婦女而還契丹主大舉入寇自易定趣恒州杜威

等至武彊聞之將自冀貝而南彰德節度使張彥澤時在恒州引兵會之言契丹可破之狀威等乃復趣恒州以彥澤為前鋒甲寅威等至中度橋契丹已據橋彥澤帥騎爭之契丹焚橋而退晉兵與契丹夾滹沱而軍始契丹見晉軍大至又爭橋不勝恐晉軍急渡滹沱與恒州合勢擊之議引兵還及聞晉軍築壘為持久之計遂不

去杜威雖以貴戚為上將性懦怯偏裨皆節度使但

日相承迎置酒作樂罕議軍事磁州刺史兼北面轉運使李穀說威及李守貞曰今大軍去恒州咫尺煙火相望若多以三股木置水中積薪布土其上橋可立成密約城中舉火相應夜募壯士斫虜營而入表裏合勢虜必遁逃諸將皆以為然獨杜威不可遣穀南至懷孟督軍糧契丹以大兵當晉軍之前潛遣其將蕭翰通事劉重進將百騎及羸卒並西山出晉軍之後斷晉糧道及

歸路樵采者遇之盡為所掠有逸歸者皆稱虜衆之盛  
軍中怵懼翰等至藥城城中戍兵千餘人不覺其至狼  
狽降之契丹獲晉民黥其面曰奉敕不殺縱之南走運  
夫在道遇之皆棄車驚潰翰契丹之舅也十二月丁巳  
朔李穀自書密奏具言大軍危急之勢請車駕幸滑州  
遣高行周符彥卿扈從及發兵守澶州河陽以備虜之  
犇衝遣軍將闕勲走馬上之己未帝始聞大軍屯中度  
是夕闕勲至庚申杜威奏請益兵詔悉發守宮禁者

得數百人赴之又詔發河北及滑孟澤潞芻糧五十萬  
詣軍前督迫嚴急所在鼎沸辛酉威又遣從者張祚等  
來告急祚等還為契丹所獲自是朝廷與軍前聲問兩  
不相通時宿衛兵皆在行營人心懍懍莫知為計開封  
尹桑維翰以國家危在旦夕求見帝言事帝方在苑中  
調鷹辭不見又詣執政言之執政不以為然退謂所親  
曰晉氏不血食矣帝欲自將北征李彥韜諫而止時符  
彥卿雖任行營職事帝留之使戍荊州口壬戌詔以歸

德節度使高行周為北面都部署以彥卿副之共戍澶州以西京留守景延廣戍河陽且張形勢奉國都指揮使王清言於杜威曰今大軍去恒州五里守此何為營孤食盡勢將自潰請以步卒二千為前鋒奪橋開道公帥諸軍繼之得入恒州則無憂矣威許諾遣清與宋彥筠俱進清戰甚銳契丹不能支勢小却諸將請以大軍繼之威不許彥筠為契丹所敗浮水抵岸得免因退走清獨帥麾下陳於水北力戰互有殺傷屢請戰於威威竟

不遣一騎助之清謂其衆曰上將握兵坐觀吾輩困急而不救此有異志吾輩當以死報國耳衆感其言莫有退者至暮戰不息契丹以新兵繼之清及士衆盡死由是諸軍皆奪氣清洛州人也甲子契丹遙以兵環晉營內外斷絕軍中食且盡杜威與李守貞宋彥筠謀降契丹威潛遣腹心詣契丹牙帳邀求重賞契丹主給之曰趙延壽威望素淺恐不能帝中國汝果降者當以汝為之威喜遂定降計丙寅伏甲召諸將出降表示之使署

名諸將駭愕莫敢言者但唯唯聽命威遣閤門使高勲  
齎詣契丹契丹主賜詔慰納之是日威悉命軍士出陳  
於外軍士皆踊躍以為且戰威親諭之曰今食盡塗窮  
當與汝曹共求生計因命釋甲軍士皆慟哭聲振原野  
威守貞仍於衆中揚言主上失德信任奸邪猜忌於已  
聞者無不切齒契丹主遣趙延壽衣赭袍至晉營慰撫  
士卒曰彼皆汝物也杜威已下皆迎謁於馬前亦以赭  
袍衣威以示晉軍其實皆戲之耳以威為太傅李守貞

為司徒威引契丹主至恒州城下諭順國節度使王周以已降之狀周亦出降戊辰契丹主入恒州遣兵襲代州刺史王暉以城降之先是契丹屢攻易州刺史郭璘固守拒之契丹主每過城下指而歎曰吾能吞併天下而為此人所扼及杜威既降契丹主遣通事耿崇美至易州誘諭其眾眾皆降璘不能制遂為崇美所殺璘邢州人也義武節度使李殷安國留後方太皆降於契丹契丹主以孫方簡為義武節度使滿達為安國節度使



以客省副使馬崇祚權知恒州事契丹翰林承旨吏部尚書張礪言於契丹主曰今大遼已得天下中國將相宜用中國人為之不宜用北人及左右近習苟政令乖失則人心不服雖得之猶將失之契丹主不從引兵自邢相而南杜威將降兵以從遣張彥澤將二千騎先取大梁且撫安吏民以通事富珠哩為都監杜威之降也皇甫遇初不預謀契丹主欲遣遇先將兵入大梁遇辭退謂所親曰吾位為將相敗不能死忍復圖其主乎至

平棘謂從者曰吾不食累日矣何面目復南行遂扼吭而死張彥澤倍道疾驅夜渡白馬津壬申帝始聞杜威等降是夕又聞彥澤至滑州召李崧馮玉李彥韜入禁中計事欲詔劉知遠發兵入援癸酉未明彥澤自封丘門斬關而入李彥韜帥禁兵五百赴之不能遏彥澤頓兵明德門外城中大擾帝於宮中起火自攜劍驅後宮十餘人將赴火為親軍將薛超所持俄而彥澤自寬仁門傳契丹主與太后書慰撫之且召桑維翰景延廣帝乃

命滅火悉開宮城門帝坐苑中與后妃相聚而泣召翰林學士范質草降表自稱孫男臣重貴禍至神惑運盡

天亡今與太后及妻馮氏舉族於郊野面縛待罪次遣男鎮寧節度使延煦威信節度使延寶奉國寶一金印

三出迎太后亦上表稱新婦李氏妾富珠哩入宣契丹主命帝脫黃袍服素衫再拜受宣左右皆掩泣帝使召張彥澤欲與計事彥澤曰臣無面目見陛下帝復召之彥澤微笑不應或勸桑維翰逃去維翰曰吾大臣逃將安

之坐而俟命彥澤以帝命召維翰維翰至天街遇李崧  
駐馬語未畢有軍吏於馬前揖維翰赴侍衛司維翰知  
不免顧謂崧曰侍中當國今日國亡反令維翰死之何  
也崧有愧色彥澤倨坐見維翰維翰責之曰去年拔公  
於罪人之中復領大鎮授以兵權何乃負恩至此彥澤  
無以應遣兵守之宣徽使孟承誨素以佞巧有寵於帝  
至是帝召承誨欲與之謀承誨伏匿不至張彥澤捕而  
殺之彥澤縱兵大掠貧民乘之亦爭入富室殺人取其

貨二日方止都城為之一空彥澤所居寶貨山積自謂  
有功於契丹晝夜以酒樂自娛出入騎從常數百人其  
旗幟皆題赤心為主見者笑之軍士擒罪人至前彥澤  
不問所犯但瞋目豎三指即驅出斷其腰領彥澤素與  
閤門使高勲不協乘醉至其家殺其叔父及弟尸諸門  
首士民不寒而慄中書舍人李濤謂人曰吾與其逃於  
溝瀆而不免不若往見之乃投刺謁彥澤曰上䟽請殺  
太尉人李濤謹來請死彥澤欣然接之謂濤曰舍人今

日懼乎濤曰濤今日之懼亦猶足下昔年之懼也鄉使  
高祖用濤言事安至此彥澤大笑命酒飲之濤引滿而  
去旁若無人

天福七年張彥澤獲亡將楊洪斷其手足  
斬之保義節度使王周奏之帝釋而不問

李濤伏閤  
極論其罪

甲戌張彥澤遷帝於開封府頃刻不得留宮

中慟哭帝與太后皇后乘肩輿宮人宦者十餘人步從  
見者流涕帝悉以內庫金珠自隨彥澤使人諷之曰契  
丹主至此物不可匿也帝悉歸之亦分以遺彥澤彥澤  
擇取其奇貨而封其餘以待契丹彥澤遣控鶴指揮使

李筠以兵守帝內外不通帝姑烏氏公主賂守門者入  
與帝訣相持而泣歸第自經死帝與太后所上契丹主  
表章皆先示彥澤然後敢發帝使取內庫帛數段主者  
不與曰此非帝物也又求酒於李崧崧亦辭以他故不  
進又欲見李彥韜彥韜亦辭不往帝惆悵久之馮玉佞  
張彥澤求自送傳國寶冀契丹復任用楚國夫人丁氏  
延煦之母也有美色彥澤使人取之太后遲迴未與彥  
澤詬詈立載之去是夕彥澤殺桑維翰以帶加頸白契

丹主云其自經契丹主曰吾無意殺維翰何為如是命厚撫其家高行周符彥卿皆詣契丹牙帳降契丹主以陽城之戰為彥卿所敗詰之彥卿曰臣當時惟知為晉主竭力今日死生惟命契丹主笑而釋之己卯延煦延寶自牙帳還契丹主賜帝手詔且遣解里謂帝曰孫勿憂必使汝有噉飯之所帝心稍安上表謝恩契丹以所獻傳國寶追琢非工又不與前史相應疑其非真以詔書詰帝使獻真者帝奏頃王從珂自焚舊傳國寶不知



所在必與之俱燼此寶先帝所為羣臣備知臣今日焉  
敢匿寶乃止帝聞契丹主將渡河欲與太后於前塗奉  
迎張彥澤先奏之契丹主不許有司又欲使帝銜璧牽  
羊大臣輿櫬迎於郊外先具儀注白契丹主契丹主曰  
吾遣奇兵直取大梁非受降也亦不許又詔晉文武羣  
官一切如故朝廷制度並用漢禮有司欲備法駕奉迎  
契丹主報曰吾方擐甲總戎太常儀衛未暇施也皆却之  
先是契丹主至相州即遣兵趣河陽捕景延廣延廣倉

猝無所逃伏往見契丹主於封丘契丹主詰之曰致兩  
主失歡皆汝所為也十萬橫磨劍安在召喬榮使相辨  
証事凡十條延廣初不服榮以紙所記語示之乃服每  
服一事輒受一籌至八籌延廣但以面伏地請死乃鎖  
之丙戌晦百官宿於封禪寺

後漢高祖天福十二年春正月丁亥朔百官遙辭晉主  
於城北乃易素服紗帽迎契丹主伏路側請罪契丹主  
貂帽貂裘衷甲駐馬高阜命起改服撫慰之左衛上將

軍安叔千獨出班北語契丹主曰汝安沒字邪汝昔鎮  
邢州已累表輸誠我不忘也叔千拜謝呼躍而退晉主  
與太后已下迎於封丘門外契丹主辭不見契丹主入  
門民皆驚呼而走契丹主登城樓遣通事諭之曰我亦  
人也汝曹勿懼會當使汝曹蘇息我無心南來漢兵引  
我至此耳至明德門下馬拜而後入宮以其樞密副使  
劉密權開封尹事日暮契丹主復出屯於赤岡高勳  
訴張彥澤殺其家人於契丹主契丹主亦怒彥澤剽掠

京城并富珠哩鎖之以彥澤之罪宣示百官問應死否  
皆言應死百姓亦投牒爭疏彥澤罪己丑斬彥澤珠哩  
於北市仍命高勲監刑彥澤前所殺士大夫子孫皆經  
杖號哭隨而詬詈以杖扑之勲命斷腕出鎖剖其心以  
祭死者市人爭破其腦取髓齧其肉而食之 契丹送  
景延廣歸其國庚寅宿陳橋夜伺守者稍怠扼吭而死  
辛卯契丹以晉主為負義侯置於黃龍府黃龍府即  
慕容氏和龍城也契丹主使謂李太后曰聞重貴不用

母命以至於此可求自便勿與俱行太后曰重貴事妾甚謹所失者違先君之志絕兩國之歡耳今幸蒙大恩全生保家母不隨子欲何所歸癸巳契丹遷晉主及其家人於封禪寺遣大同節度使兼侍中河內崔廷勳以兵守之契丹主數遣使存問晉主每聞使至舉家憂恐時雨雪連旬外無供億上下凍餒太后使人謂寺僧曰吾嘗於此飯僧數萬今日獨無一人相念耶僧辭以彼意難測不敢獻食晉主陰祈守者乃稍得食是日契

丹主自赤岡引兵入宮都城諸門及宮禁門皆以契丹  
守衛晝夜不釋兵仗礮犬於門以竿懸羊皮於庭為厭  
勝契丹主謂晉羣臣曰自今不修甲兵不市戰馬輕賦  
省役天下太平矣廢東京降開封府為汴州尹為防禦  
使乙未契丹主改服中朝衣冠百官起居皆如舊制趙  
延壽張礪共薦李崧之才會威勝節度使馮道自鄧州  
入朝契丹主素聞二人名皆禮重之未幾以崧為太子  
太師充樞密使道守太傅於樞密院祇候以備顧問契

丹主分遣使者以詔書賜晉之藩鎮晉之藩鎮爭上表稱臣被召者無不犇馳而至惟彰義節度使史匡威據涇州不受命匡威建瑋之子也雄武節度使何重建斬契丹使者以秦成階三州降蜀初杜重威既以晉軍降契丹契丹主悉收其鎧仗數百萬貯恒州驅馬數萬歸其國遣重威將其衆從已而南及河契丹主以晉兵之衆恐其為變欲悉以胡騎擁而納之河流或諫曰晉兵在他所者尚多彼聞降者盡死必皆拒命為患不若且

撫之徐思其策契丹主乃使重威以其衆屯陳橋會久  
雪官無所給士卒凍餒咸怨重威相聚而泣重威每出  
道旁人皆罵之契丹主猶欲誅晉兵趙延壽言於契丹  
主曰皇帝親冒矢石以取晉國欲自有之乎將為他人  
取之乎契丹主變色曰朕舉國南征五年不解甲僅能  
得之豈為他人乎延壽曰晉國南有唐西有蜀常為仇  
敵皇帝亦知之乎曰知之延壽曰晉國東自沂密西及  
秦鳳延袤數千里邊於吳蜀常以兵戍之南方暑濕上



國之人不能居也他日車駕北歸以晉國如此之大無  
兵守之吳蜀必相與乘虛入寇如此豈非為他人取之  
乎契丹主曰我不知也然則柰何延壽曰陳橋降卒可  
分以戍南邊則吳蜀不能為患矣契丹主曰吾昔在上  
黨失於斷割悉以唐兵授晉既而返為仇讎北向與吾  
戰辛勤累年僅能勝之今幸入吾手不因此時悉除之  
豈可復留以為後患乎延壽曰鄉留晉兵於河南不質  
其妻子故有此憂今若悉徙其家於恒定雲朔之間每

歲分番使戍南邊何憂其為變哉此上策也契丹主悅  
曰善惟大王所以處之由是陳橋兵始得免分遣還營  
癸卯晉主與李太后安太妃馮后及弟睿子延煦延  
寶俱北遷後宮左右從者百餘人契丹遣三百騎援送  
之又遣晉中書令趙瑩樞密使馮玉馬軍都指揮使李  
彥韜與之俱晉主在塗供饋不繼或時與太后俱絕食舊  
臣無敢進謁者獨磁州刺史李穀迎謁於路相對泣下  
穀曰臣無狀負陛下因傾貲以獻晉主至中度橋見杜

重威寨歎曰天乎我家何負為此賊所破慟哭而去

契丹主以前燕京留守劉晞為西京留守永康王鄂約之弟留珪為義成節度使族人隆和為鎮寧節度使鄂約姊壻潘耀尼為橫海節度使趙延壽之子匡贊為護國節度使漢將張彥超為雄武節度使史侁為彰義節度使客省副使劉晏僧為忠武節度使前護國節度使侯益為鳳翔節度使權知鳳翔府事焦繼勲為保大節度使晞涿州人也既而何重建附蜀史匡威不受代契

丹勢稍沮 晉主之絕契丹也匡國節度使劉繼勳為宣徽北院使頗預其謀契丹主入汴繼勳入朝契丹主責之時馮道在殿上繼勳急指道曰馮道為首相與景延廣實為此謀臣位卑何敢發言契丹主曰此叟非多事者勿妄引之命鎖繼勳將送黃龍府趙在禮至洛陽謂人曰契丹主嘗言莊宗之亂由我所致我此行良可憂契丹遣契丹將蘓葉奚王伊喇勃海將噶瑪哈戍洛陽在禮入謁拜於庭下伊喇等皆踞坐受之乙卯在禮

至鄭州聞繼勲被鎖大驚夜自經於馬櫪間契丹主聞  
在禮死乃釋繼勲繼勲憂憤而卒劉晔在契丹嘗為樞  
密使同平章事至洛陽詬奚王曰趙在禮漢家大臣爾  
北方一酋長耳安得慢之如此立於庭下以挫之由是  
洛人稍安契丹主廣受四方貢獻大縱酒作樂每謂晉  
臣曰中國事我皆知之吾國事汝曹弗知也趙延壽請  
給上國兵廩食契丹主曰吾國無此法乃縱胡騎四出  
以收馬為名分番剽掠謂之打草穀丁壯斃於鋒刃老

弱委於溝壑自東西兩畿及鄭滑曹濮數百里間財畜殆盡契丹主謂判三司劉昫曰契丹兵三十萬既平晉國應有優賜速宜營辦時府庫空竭昫不知所出請括借都城士民錢帛自將相以下皆不免又分遣使者數十人詣諸州括借皆迫以嚴誅人不聊生其實無所頒給皆蓄之內庫欲輦歸其國於是內外怨憤始患苦契丹皆思逐之矣初晉主與河東節度使中書令北平王劉知遠相猜忌雖以為北面行營都統徒尊以虛名

而諸軍進止實不得預聞知遠因之廣募士卒陽城之戰諸軍散卒歸之者數千人又得吐谷渾財畜由是河東富彊冠諸鎮步騎至五萬人晉主與契丹結怨知遠知其必危而未嘗論諫契丹屢深入知遠初無邀遮入援之志及聞契丹入汴知遠分兵守四境以防侵軼遣客將安陽王峻奉三表詣契丹主一賀入汴二以太原夷夏雜居戍兵所聚未敢離鎮三以應有貢物值契丹將劉九一軍自土門西入屯於南川城中憂懼俟召還

此軍道路始通可以入貢契丹主賜詔褒美及進畫親  
加兒字於知遠姓名之上仍賜以木拐國法優禮大臣  
則賜之如漢賜几杖之比惟偉王以叔父之尊得之知  
遠又遣北都副留守太原白文珂入獻奇繒名馬契丹  
主知知遠觀望不至及文珂還使謂知遠曰汝不事南  
朝又不事北朝意欲何所俟耶蕃漢孔目官郭威言於  
知遠曰彼恨我深矣王峻言契丹貪殘失人心必不能  
久有河南或勸知遠舉兵進取知遠曰用兵有緩有急



當隨時制宜今契丹新降晉軍十萬虎據京邑未有他  
變豈可輕動哉且觀其所利止於貨財貨財既足必將  
北去況冰雪已消勢難久留宜待其去然後取之可以  
萬全昭義節度使張從恩以地迫懷洛欲入朝於契丹  
遣使謀於知遠知遠曰我以一隅之地安敢抗天下之  
大君宜先行我當繼往從恩以為然判官高防諫曰公  
晉室懿親不可輕變臣節從恩不從左驍衛大將軍王  
守恩與從恩姻家時在上黨從恩以副使趙行遷知留

後牒守恩權巡檢使與高防佐之遂行守恩建立之子

也契丹主召晉百官悉集於庭問曰吾國廣大方數

萬里有君長二十七人今此地之俗異於吾國吾欲擇

一人君之如何皆曰天無二日夷夏之心皆願推戴皇

帝如是者再契丹主乃曰汝曹既欲君我今茲所行何

事為先對曰王者初有天下應大赦三月丁巳朔契丹主

服通天冠絳紗袍登正殿設樂懸儀衛於庭百官朝賀

華人皆法服北人仍故服立於文武班中間下制稱大

遼會同十年大赦仍云自今節度使刺史毋得置牙兵  
市戰馬趙延壽以契丹主負約心怏怏令李崧言於契  
丹主曰漢天子所不敢望乞為皇太子崧不得已為言  
之契丹主曰我於燕王雖割吾肉有用於燕王吾無所  
愛然吾聞皇太子當以天子兒為之豈燕王所可為也  
因令為燕王遷官時契丹以恒州為中京翰林承旨張  
礪奏擬燕王中京留守大丞相錄尚書事都督中外諸  
軍事樞密使如故契丹主取筆塗去錄尚書事都督中

外諸軍事而行之

劉知遠聞何重建降蜀歎曰強敵

憑陵中朝無主令藩鎮外附吾為方伯良可愧也於是

將佐勸知遠稱尊號以號令四方觀諸侯去就知遠不

許聞晉主北遷聲言欲出兵井陘迎歸晉陽丁卯命武

節都指揮使榮澤史弘肇集諸軍於毬場告以出師之

期軍士皆曰今強寇陷京城執天子天下無主主天下

者非我王而誰宜先正位號然後出師爭呼萬歲不已

知遠曰虜勢尚彊吾軍威未振當且建功業士卒何知

命左右遏止之已已行軍司馬潞城張彥威等三上牋  
勸進知遠疑未決郭威與都押牙冠氏楊邠入說知遠  
曰今遠近之心不謀而同此天意也王不乘此際取之  
謙讓不居恐人心且移移則反受其咎知遠從之契

丹以其將劉愿為保義節度副使陝人苦其暴虐奉國  
都頭王晏與指揮使趙暉都頭侯章謀曰今大盜移國  
乃吾屬奮發之秋河東劉公威德遠著吾輩若殺愿舉  
陝城歸之為天下倡取富貴如反掌耳暉等然之晏與

壯士數人夜踰牙城入府出庫兵以給衆庚午旦斬愿  
首懸諸府門又殺契丹監軍奉暉為留後晏徐州暉澶  
州章太原人也 辛未劉知遠即皇帝位自言未忍改晉  
國又惡開運之名乃更稱天福十二年壬申詔諸道為  
契丹括率財帛者皆罷之其晉臣被迫脅為使者勿問  
令詣行在自餘契丹所在誅之 甲戌帝自將東迎晉  
主及太后至壽陽聞已過恒州數日乃留兵戍承天軍  
而還晉主既出塞契丹無復供給從官宮女皆自采木

實草葉而食之至錦州契丹令晉主及后妃拜契丹主  
按巴堅墓晉主不勝屈辱泣曰薛超誤我馮后陰令左  
右求毒藥欲與晉主俱自殺不果契丹主聞帝即位以  
通事耿崇美為昭義節度使高唐英為彰德節度使崔  
廷勳為河陽節度使以控扼要害初晉置鄉兵號天威  
軍教習歲餘村民不閑軍旅竟不可用悉罷之但令七  
戶輸錢十千其鎧仗悉輸官而無賴子弟不復肯復農  
業山林之盜自是而繁及契丹入汴縱胡騎打草穀又

多以其子弟及親信左右為節度使刺史不通政事華  
人之狡獪者多徃依其麾下教之妄作威福掊斂貨財  
民不堪命於是所在相聚為盜多者數萬人少者不減  
千百攻陷州縣殺掠吏民淦陽賊帥梁暉有衆數百送  
款晉陽求效用帝許之磁州刺史李穀密通表於帝令  
暉襲相州暉偵知高唐英未至相州積兵器無守備丁  
丑夜遣壯士踰城入啓關納其衆殺契丹數百其守將  
突圍走暉據州自稱留後表言其狀 戊寅帝還至晉



陽議率民財以賞將士夫人李氏諫曰陛下因河東創大業未有以惠澤其民而先奪其生生之資殆非新天子所以救民之意也今宮中所有請悉出之以勞軍雖復不厚人無怨言帝曰善即罷率民傾內府蓄積以賜將士中外聞之大悅李氏晉陽人也建雄留後劉在明朝於契丹以節度副使駱從朗知州事帝遣使者張晏洪等如晉州諭以已即帝位從朗皆囚之大將藥可儔殺從朗推晏洪權留後庚辰遣使以聞契丹主遣右諫

議大夫趙熙使晉州括率錢帛徵督甚急從朗既死民相帥共殺熙契丹主賜趙暉詔即以為保義留後暉斬契丹使者焚其詔遣支使河間趙矩奉表詣晉陽契丹遣其將噶瑪哈攻暉不克帝見矩甚喜曰子挈咽喉之地以歸我天下不足定也矩因勸帝早引兵南向以副天下之望帝善之辛巳以暉為保義節度使侯章為鎮國節度使保義軍馬步都指揮使王晏為絳州防禦使保義軍馬步副都指揮使鎮寧節度使耶律隆和性

殘虐澶州人苦之賊帥王瓊帥其徒千餘人夜襲據南城比渡浮航縱兵大掠圍隆和於牙城契丹主聞之甚懼始遣天平節度使李守貞天雄節度使杜重威還鎮由是無久留河南之意遣兵救澶州瓊退屯近郊遣其弟超奉表來求救癸未帝厚賜超遣還瓊兵敗為契丹所殺契丹舒嚕太后遣使以其國中酒饌脯果賜契丹主賀平晉國契丹主與羣臣宴於永福殿東方羣盜大起陷宋亳密三州契丹主謂左右曰我不知中國

之人難制如此亟遣泰寧節度使安審琦武寧節度使符彥卿等歸鎮仍以契丹兵送之彥卿至堽橋賊帥李仁恕帥衆數萬急攻徐州彥卿與數十騎至城下揚鞭欲招諭之仁恕控彥卿馬請從相公入城彥卿子昭序自城中遣軍校陳守習縋而出呼於賊中曰相公已陷虎口聽相公助賊攻城城不可得也賊知不可劫乃相帥羅拜於彥卿馬前乞赦其罪彥卿與之誓乃解去

三月丙戌朔契丹主服赭袍坐崇元殿百官行入閣禮

戊子帝遣使以詔書安集農民保聚山谷避契丹之  
患者 契丹主復召晉百官諭之曰天時向暑吾難久  
留欲暫至上國省太后當留親信一人於此為節度使  
百官請迎太后契丹主曰太后族大如古栢根不可移  
也契丹主欲盡以晉之百官自隨或曰舉國北遷恐搖  
人心不如稍稍遷之乃詔有職事者從行餘留大梁復  
以汴州為宣武軍以蕭翰為節度使翰舒嚕太后之兄  
子其妹復為契丹主后翰始以蕭為姓自是契丹后族

皆稱蕭氏 壬寅契丹主發大梁晉文武諸司從者數  
千人諸軍吏卒又數千人宮女宦官數百人盡載府庫  
之寶以行所留樂器儀仗而已夕宿赤岡契丹主見村  
落皆空命有司發榜數百通所在招撫百姓然竟不禁  
胡騎剽掠丙午契丹自白馬渡河謂宣徽使高勲曰吾  
在上國以射獵為樂至此令人悵悵今得歸死無恨矣  
庚戌以皇弟北京馬步都指揮使崇行太原尹 辛  
亥契丹主將攻相州梁暉請降契丹主赦之許以為防

禦使暉疑其詐復乘城拒守夏四月己未未明契丹主  
命蕃漢諸軍急攻相州食時克之悉殺城中男子驅其  
婦女而北北人擲嬰孩於空中舉刃接之以為樂留高  
唐英守相州唐英閱城中遺民男女得七百餘人其後  
節度使王繼弘斂城中髑髏瘞之凡得十餘萬或告磁  
州刺史李穀謀舉州應漢契丹主執而詰之穀不服契  
丹主引手於車中若取所獲文書者穀知其詐因請曰  
必有其驗乞顯示之凡六詰穀辭氣不屈乃釋之帝

以從弟北京馬軍都指揮使信領義成節度使充侍衛  
馬軍都指揮使武節都指揮使史弘肇領忠武節度使  
充步軍都指揮使右都押牙楊邠權樞密使蕃漢兵馬  
都孔目官郭威權副樞密使兩使都孔目官南樂王章  
權三司使 契丹主見所過城邑丘墟謂蕃漢羣臣曰  
致中國如此皆燕王之罪也顧張礪曰爾亦有力焉

契丹昭義節度使耿崇美屯澤州將攻潞州乙丑詔史  
弘肇將步騎萬人救之 帝聞契丹北歸欲經畧河南



故以弘肇為前驅又遣閭萬進出北方以分契丹兵勢  
萬進并州人也契丹主以船數十艘載晉鎧仗將自  
汴沂河歸其國命寧國都虞候榆次武行德將士卒千  
餘人部送之至河陰行德與將士謀曰今為虜所制將  
遠去鄉里人生會有死安能為異域之鬼乎彼勢不能  
久留此地不若共逐其黨堅守河陽以俟天命之所歸  
者而臣之豈非長策乎眾以為然行德即以鎧仗授之  
相與殺契丹監軍使會契丹河陽節度使崔廷勲以兵

送耿崇美之潞州行德遂乘虛入據河陽衆推行德為  
河陽都部署行德遣弟行友奉蠟表間道詣晉陽契丹  
遣武定節度使方太詣洛陽巡檢至鄭州州有戍兵共  
迫太為鄭王梁嗣密王朱乙逃禍為僧嵩山賊帥張遇  
得之立以為天子取嵩嶽神衮冕以衣之帥衆萬餘襲  
鄭州太擊走之太以契丹尚彊恐事不濟說諭戍兵欲  
與之俱西衆不從太自西門逃犇洛陽戍兵既失太反  
譖太於契丹云脅我為亂太遣子師朗自訴於契丹契

丹將滿達殺之太無以自明會羣盜攻洛陽契丹留守  
劉晞棄城奔許州太乃入府行留守事與巡檢使潘環  
擊羣盜却之張遇殺朱乙請降伊闕賊帥自稱天子誓  
衆於南郊壇將入洛陽太逆擊走之太欲自歸於晉陽  
武行德使人誘太曰我裨校也公舊鎮此地今虛位相  
待太信之至河陽為行德所殺蕭翰遣噶瑪哈援送劉  
晞自許還洛陽晞疑潘環構其衆逐已使瑪哈殺之戊  
辰武行友至晉陽庚午史弘肇奏遣先鋒將馬誨擊契

丹斬首千餘級時耿崇美崔廷勲至澤州聞弘肇兵已入潞州不敢進引衆而南弘肇遣誨追擊破之崇美廷勲與奚王伊喇退保懷州辛未以武行德為河陽節度使契丹主聞河陽亂嘆曰我有三失宜天下之叛我也諸道括錢一失也令上國人打草穀二失也不早遣諸節度使還鎮三失也契丹主至臨城得疾及藥城病甚苦熱聚冰於胷腹手足且啖之丙子至殺狐林而卒國人剖其腹實鹽數斗載之北去晉人謂之帝羆趙延

壽恨契丹主負約謂人曰我不復入龍沙矣即日先引兵入恒州契丹永康王鄂約及南北二王各以所部兵相繼而入延壽欲拒之恐失大援乃納之時契丹諸將已密議奉鄂約為主鄂約登鼓角樓受叔兄拜而延壽不之知自稱受契丹皇帝遺詔權知南朝軍國事仍下教布告諸道所以供給鄂約與諸將同鄂約銜之恒州諸門管鑰及倉庫出納鄂約皆自主之延壽使人請之不與契丹主喪至國舒嚕太后不哭曰待諸部寧壹如

故則葬汝矣 帝之自壽陽還也留兵千人戍承天軍

戍兵聞契丹北還不為備契丹襲擊之戍兵驚潰契丹  
焚其市邑一日狼煙百餘舉帝曰此彼將遁張虛勢也  
遣親將葉仁魯將步騎三千赴之會契丹出剽掠仁魯  
乘虛大破之丁丑復取承天軍 或說趙延壽曰契丹

諸大人數日聚謀此必有變今漢兵不減萬人不若先  
事圖之延壽猶豫不決壬午延壽下令以來月朔日於  
待賢館上事受文武官賀其儀宰相樞密使拜於階上

節度使以下拜於階下李崧以衆意不同事理難測固請趙延壽未行此禮乃止 五月乙酉朔永康王鄂約

召延壽及張礪和凝李崧馮道於所館飲酒鄂約妻素以兄事延壽鄂約從容謂延壽曰妹自上國來寧欲見之乎延壽欣然與之俱入良久鄂約出謂礪等曰燕王謀反適已鎖之矣又曰先帝在汴時遺我一籌許我知南朝軍國近者臨崩別無遺詔而燕王擅自知南朝軍國豈理耶下令延壽親黨皆釋不問間一日鄂約至待

賢館受蕃漢官謁賀笑謂張礪等曰燕王果於此禮上  
吾以鐵騎圍之諸公亦不免矣後數日集蕃漢之臣於  
府署宣契丹主遺制其畧曰永康王大聖皇帝之嫡孫  
人皇王之長子太后鍾愛羣情允歸可於中京即皇帝  
位於是始舉哀成服 帝集羣臣庭議進取諸將咸請  
出師并陘次取鎮魏先定河北則河南拱手自服帝欲  
自石會趨上黨郭威曰德光雖死黨衆猶盛各據堅城  
我出河北兵少路迂傍無應援若彼衆合勢共擊我軍



進則遮前退則邀後糧餉路絕此危道也上黨山路險澁粟少民殘無以供億亦不可由近者陝晉二鎮相繼款附引兵從之萬無一失不出兩旬洛汴定矣帝曰卿言是也蘇逢吉等曰史弘肇大軍已屯上黨羣寇繼遁不若出天井抵孟津為便司天奏太歲在午不利南行宜由晉絳抵陝帝從之辛卯詔以十二日發北京告諭諸道甲午以太原尹崇為北京留守以趙州刺史李存瓌為副留守河東幕僚真定李驤為少尹牙將太原

蔚進為馬步指揮使以佐之存瓌唐莊宗之從弟也

丙申帝發太原自陰地關出晉絳丁酉史弘肇奏克澤  
州始弘肇攻澤州刺史翟令奇固守不下帝以弘肇兵  
少欲召還蘇逢吉楊邠曰今陝晉河陽皆已向化崔廷  
勲耿崇美朝夕遁去若召弘肇還則河南人心動揺敵  
勢復壯矣帝未決使人諭旨於弘肇曰兵已及此勢如  
破竹可進不可退與逢吉等議合帝乃從之弘肇遣部  
將李萬超說令奇令奇乃降弘肇以萬超權知澤州

崔廷勲耿崇美奚王伊喇合兵逼河陽張遇帥衆數千  
救之戰於南阪敗死武行德出戰亦敗閉城自守伊喇  
欲攻之廷勲曰今北軍已去得此何用且殺一夫猶可  
惜況一城乎聞弘肇已得澤州乃釋河陽還保懷州弘  
肇將至廷勲等擁衆北遁過衛州大掠而去契丹在河  
南者相繼北去弘肇引兵與武行德合弘肇為人沈毅  
寡言御衆嚴整將校小不從命立搃殺之士卒所過犯  
民田及繫馬於樹者皆斬之軍中惕息莫敢犯令故所

向必克帝自晉陽安行入洛及汴兵不血刃皆弘肇之力也帝由是倚愛之辛丑帝至霍邑甲辰帝至晉州

帝之即位也絳州刺史李從朗與契丹將成霸卿等拒命帝遣西南面招討使護國節度使白文珂攻之未下帝至城下命諸軍四布而勿攻以利害諭之戊申從朗舉城降帝命親將分護諸門士卒一人毋得入以偏將薛瓊為防禦使辛亥帝至陝州趙暉自御帝馬而入壬子至石壕汴人有來迎者六月乙卯帝至新安西

京留司官悉來迎 丙辰帝至洛陽入居宮中汴州百官  
奉表來迎詔諭以受契丹補署者皆勿自疑聚其告牒  
而焚之趙遠更名上交命鄭州防禦使郭從義先入大  
梁清宮密令殺李從益及王淑妃淑妃且死曰吾兒為  
契丹所立何罪而死何不留之使每歲寒食以一盂麥  
飯洒明宗陵乎聞者泣下 戊午帝發洛陽 辛酉汴  
州百官竇貞固等迎於滎陽甲子帝至大梁晉之藩鎮  
相繼來降 戊辰帝下詔大赦凡契丹所除節度使下

至將吏各安職任不復變更復以汴州為東京改國號曰漢仍稱天福年曰余未忍忘晉也復青襄汝三節度秋閏七月庚辰制建宗廟太祖高皇帝世祖光武皇帝皆百世不遷又立四親廟追尊謚號凡六廟

三叛連兵

後漢高祖天福十二年夏五月乙酉朔契丹永康王鄂約囚趙延壽於恒州辛丑帝遣使諭河中節度使趙匡贊仍以契丹囚其父延壽告之秋七月或傳趙延壽

已死郭威言於帝曰趙匡贊契丹所署今猶在河中宜遣使弔祭因起復移鎮彼既家國無歸必感恩承命從之會鄴都留守天雄節度使兼中書令杜重威天平節度使兼侍中李守貞皆奉表歸命重威仍請移它鎮歸德節度使兼中書令高行周入朝丙申徙重威為歸德節度使以行周代之守貞為護國節度使加兼中書令徙護國節度使趙匡贊為晉昌節度使後二年延壽始卒於契丹杜重威自以附契丹負天下內常疑懼及

移鎮制下復拒而不受遣其子弘璩質於滿達以求援  
趙延壽有幽州親兵二千在恒州指揮使張璉將之重  
威請以守魏滿達遣其將楊衮將契丹千五百人及幽  
州兵赴之閏月庚午詔削奪重威官爵以高行周為招  
討使鎮寧節度使慕容彥超副之以討重威 慕容彥  
超欲急攻城行周欲緩之由是二將不協帝恐生他變  
欲自將擊重威九月戊寅詔幸澶魏勞軍 庚辰帝發  
大梁 晉昌節度使趙匡贊恐終不為朝廷所容冬十



月遣使降蜀請自東南路出兵應援 帝至鄴都遣給事中陳觀往諭指重威復閉門拒之城申食浸竭將士多出降者慕容彥超固請攻城帝從之丙午親督諸將攻城自寅至辰士卒傷者萬餘人死者千餘人不克而止彥超乃不敢復言初契丹留幽州兵千五百人戍大梁帝入大梁或告幽州兵將為變帝盡殺之於繁臺之下及圍鄴都張璉將幽州兵二千助重威拒守帝屢遣人招諭許以不死璉曰繁臺之卒何罪而戮今守此以

死為期耳由是城久不下十一月丙辰內殿直韓訓獻  
攻城之具帝曰城之所恃者衆心耳衆心苟離城無所  
保用此何為杜重威之叛也觀察判官金鄉王敏屢泣  
諫不聽及食竭力盡甲戌遣敏奉表出降乙亥重威子  
弘璉來見丙子妻石氏來見石氏即晉之宋國長公主  
也帝復遣入城丁丑重威開門出降城中餓死者什七  
八存者皆尪瘠無人狀張璉先邀朝廷信誓詔許以歸  
鄉里及出降殺璉等將校數十人縱其士卒北歸將出

境大掠而去郭威請殺重威牙將百餘人并重威家皆籍之以賞戰士從之以重威為太傅兼中書令楚國公重威每出入路人往往擲瓦石詬之

臣光曰漢高祖殺幽州無辜千五百人非仁也誘張璉而誅之非信也杜重威罪大而赦之非刑也仁以合衆信以行令刑以懲姦失此三者何以守國其祚運之不延也宜哉

十二月丙戌帝發鄴都 蜀主遣雄武都押牙吳崇輝

以樞密使王處回書招鳳翔節度使侯益庚寅以山南  
西道節度使兼中書令張虔釗為北面行營招討安撫使  
雄武節度使何重建副之宣徽使韓保貞為都虞候其將  
兵五萬虔釗出散關重建出隴州以擊鳳翔奉鑾肅衛都  
虞候李廷珪將兵二萬出子午谷以援長安諸軍發成都  
旌旗數十里 癸巳帝至大梁 侯益請降於蜀使吳崇  
暉持兵籍糧帳西還與趙匡贊同上表請出兵平定關中  
乾祐元年春正月帝以趙匡贊侯益與蜀兵共為寇患

之會回鶻入貢訴稱為党項所阻乞兵應接詔右衛大將軍王景崇將軍齊藏珍將禁軍數千赴之因使之經畧關西晉昌節度判官李恕久在趙延壽幕下延壽使之佐匡贊匡贊將入蜀恕諫曰燕王入北豈所願哉今漢家新得天下方務招懷若謝罪歸朝必保富貴入蜀非全計也蹄涔不容尺鯉公必悔之匡贊乃遣恕奉表請入朝景崇等未行而恕至帝問恕匡贊何為附蜀對曰匡贊自以身受偽官父在北廷恐陛下未之察故附蜀

求苟免耳臣以為國家必應存撫故遣臣來祈哀帝曰  
匡贊父子本吾人也不幸失所今延壽方墜檻穽吾何  
忍更害匡贊乎即聽其入朝侯益亦請赴二月四日聖  
壽節上壽景崇等將行帝召入卧内敕之曰匡贊益之  
心皆未可知汝至彼彼已入朝則勿問若尚遷延顧望  
當以便宜從事 趙匡贊不俟李恕返命已離長安丙  
子入見王景崇等至長安聞蜀兵已入秦川以兵少發  
本道及趙匡贊牙兵千餘人同拒之景崇恐匡贊牙兵

亡逸欲文其面微露風旨軍校趙思綰首請自文其面  
以帥下景崇悅齊藏珍竊言曰思綰凶暴難制不如殺  
之景崇不聽思綰魏州人也蜀李廷珪將至長安聞趙  
匡贊已入朝欲引歸王景崇邀之敗廷珪於子午谷張  
虔釗至寶鷄諸將議不協按兵未進侯益聞廷珪西還  
因閉壁拒蜀兵虔釗勢孤引兵夜遁景崇帥鳳翔隴邠  
涇鄜坊之兵追敗蜀兵於散關俘將卒四百人丁丑  
帝殂秘不發喪庚辰下詔稱重威父子因朕小疾謗議

搖衆并其子弘璋弘璉弘琛皆斬之二月辛巳發喪宣  
遺制皇子承祐即皇帝位 詔以王景崇兼鳳翔巡檢  
使景崇引兵至鳳翔侯益尚未行景崇以禁兵分守諸  
門或勸景崇殺益景崇以受先朝密旨嗣主未之知或  
疑於專殺猶豫未決益聞之不告景崇而去景崇悔自  
詬戍戍益入朝隱帝問何故召蜀軍對曰臣欲誘致而  
殺之帝哂之 二月侯益家富於財厚賂執政由是大  
臣爭譽之丙寅以益兼中書令行開封尹 侯益盛毀



王景崇於朝言其恣橫景崇聞益尹開封知事已變內不自安且怨朝廷會詔遣供奉官王益如鳳翔徵趙匡贊牙兵詣闕趙思綰等甚懼景崇因以言激之思綰途中謂其黨常彥卿曰小太尉已落其手吾屬至京師并死矣奈何彥卿曰臨機制變子勿復言癸酉至長安永興節度副使安友規巡檢喬守溫出迎王益置酒於客亭思綰前白曰壕寨使已定舍館於城東今將士家屬皆在城中欲各入城挈家詣城東宿友規等然之時思綰

等皆無鎧仗既入西門有州校坐門側思綰遽奪其劍  
斬之其徒因大譟持白挺殺守門者十餘人分遣其黨  
守諸門思綰入府開庫取鎧仗給之友規等皆逃去思  
綰遂據城集城中少年得四千餘人繕城隍葺樓堞旬  
日間戰守之具皆備王景崇諷鳳翔吏民表景崇知軍  
府事朝廷患之甲戌徙靜難節度使王守恩為永興節度  
使徙保義節度使趙暉為鳳翔節度使並同平章事以  
景崇為邠州留後令便道之官虢州伶人靖邊庭殺團

練使田令方驅掠州民犇趙思綰至潼關潼關守將出擊之其衆皆潰 丁丑邠涇同華四鎮俱上言護國節

度使兼中書令李守貞與永興鳳翔同反始守貞聞杜重威死而懼陰有異志自以晉世嘗為上將有戰功素好施得士卒心漢室新造天子年少初立執政皆後進有輕朝廷之志乃招納亡命養死士治城塹繕甲兵晝夜不息遣人間道齎蠟丸結契丹屢為邊庭所獲浚儀人趙修已素善術數自守貞鎮滑州署司戶參軍累從

移鎮為守貞言時命不可勿妄動前後切諫非一守貞不聽乃稱疾歸鄉里僧總倫以術媚守貞言其必為天子守貞信之又嘗會將佐置酒引弓指舐掌虎圖曰吾有非常之福當中其舌一發中之左右皆賀守貞益自負會趙思綰據長安奉表獻御衣於守貞守貞自謂天人協契乃自稱秦王遣其驍將平陸王繼勲將兵據潼關以思綰為晉昌節度使同州距河中最近匡國節度使張彥威常謂守貞所為奏請先為之備詔滑州馬軍

都指揮使羅金山將步兵戍同州故守貞起兵同州不

為所併金山雲州人也 夏四月以鎮寧節度使郭從

義充永興行營都部署將侍衛兵討趙思綰戍子以保

義節度使白文珂為河中行營都部署內客省使王浚

為都監辛卯削奪李守貞官爵命文珂等會兵討之乙

未以寧江節度使侍衛步軍都指揮使尚洪遷為西面

行營都虞候 王景崇遷延不之邠州閱集鳳翔丁壯

詐言討趙思綰仍牒邠州會兵 王景崇遺蜀鳳州刺

史徐彥書求通互市壬戌蜀主使彥復書招之 六月

乙酉王景崇遣使請降於蜀亦受李守貞官爵 西面

行營都虞候尚洪遷攻長安重傷而卒 秋七月鳳翔

節度使趙暉至長安乙亥表王景崇反狀益明請進兵

擊之 自河中永興鳳翔三鎮拒命以來朝廷繼遣諸

將討之昭義節度使常思屯潼關白從珂屯同州趙暉

屯咸陽惟郭從義王峻置柵近長安而二人相惡如水

火自春徂秋皆相伏莫肯攻戰帝患之欲遣重臣臨督

八月壬午以郭威為西面軍前招諭安撫使諸軍皆受威節度威將行問策於太師馮道道曰守貞自謂舊將為士卒所附願公勿愛官物以賜士卒則奪其所恃矣威從之由是衆心始附於威詔白文珂趣河中趙暉趣鳳翔戊子蜀改鳳翔曰岐陽軍己丑以王景崇為岐陽節度使同平章事郭威與諸將議攻討諸將欲先取長安鳳翔鎮國節度使扈彥珂曰今三叛連衡推守貞為主守貞亡則兩鎮自破矣若捨近而攻遠萬一

王趙拒吾前守貞倚吾後此危道也威善之於是威自  
陝州白文珂及寧江節度使侍衛步軍都指揮使劉詞  
自同州常思自潼關三道攻河中威撫養士卒與同苦  
樂小有功輒厚賞之微有傷常親視之士無賢不肖有  
所陳啓皆溫辭色而受之違忤不怒小過不責由是將  
卒咸歸心於威始李守貞以禁軍皆嘗在麾下受其恩  
施又士卒素驕苦漢法之嚴謂其至則叩城奉迎可坐  
而待之既而士卒新受賜於郭威皆忘守貞舊恩已亥



至城下揚旗伐鼓踊躍詬譟守貞視之失色白文珂克  
西關城柵於河西常思柵於城南威柵於城西未幾威  
以常思無將領才先遣歸鎮諸將欲急攻城威曰守貞  
前朝宿將健鬪好施屢立戰功況城臨大河樓堞完固  
未易輕也且彼馮城而鬪吾仰而攻之何異帥士卒投  
湯火乎夫勇有盛衰攻有緩急時有可否事有後先不  
若且設長圍而守之使飛走路絕吾洗兵牧馬坐食轉  
輸溫飽有餘俟城中無食公帑家財皆竭然後進梯衝

以逼之飛書檄以招之彼之將士脫身逃死父子且不  
相保況烏合之衆乎思綰景崇但分兵縻之不足慮也  
乃發諸州民夫二萬餘人使白文珂等帥之剗長壕築  
連城列隊伍而圍之威又謂諸將曰守貞鄉畏高祖不  
敢鴟張以我輩崛起太原事功未著有輕我心故敢反  
耳正宜靜以制之乃偃旗卧鼓但循河設火鋪連延數  
十里番步卒以守之遣水軍艤舟於岸寇有潛往來者  
無不擒之於是守貞如坐網中矣 九月蜀兵援王景

崇軍於散關趙暉遣都監李彥從襲擊破之蜀兵遁去  
王景崇盡殺侯益家屬七十餘人益子前天平行軍  
司馬仁矩先在外得免庚申以仁矩為隰州刺史仁矩  
子延廣尚在襁褓乳母劉氏以己子易之抱延廣而逃  
乞食至於大梁歸於益家李守貞屢出兵欲突長圍  
皆敗而返遣人齎蠟丸求救於唐蜀契丹皆為邏者所  
獲城中食且盡殍死者日衆守貞憂形於色召總倫詰  
之總倫曰大王當為天子人不能奪但此分野有災待

磨滅將盡只餘一人一騎乃大王鵲起之時也守貞猶

以為然冬十月王景崇遣其子德讓趙思綰遣其子懷  
乂見蜀主於成都戊寅景崇遣兵出西門趙暉擊破之  
遂取西關城景崇退守大城暉塹而圍之數挑戰不出  
暉潛遣千餘人擐甲執兵效蜀旗幟循南山而下令諸  
軍聲言蜀兵至矣景崇果遣兵數千出迎之暉設伏掩  
擊盡殪之自是景崇不復敢出蜀主遣山南西道節度  
使安思謙將兵救鳳翔左僕射兼門下侍郎同平章事

母昭裔上疏諫曰臣竊見莊宗皇帝志貪西顧前蜀主  
意欲北行凡在庭臣皆貢諫疏殊無聽納有何所成只  
此兩朝可為鑑戒不聽又遣雄武節度使韓保貞引兵  
出汧陽以分漢兵之勢王景崇遣前義成節度使酸棗  
李彥舜等逆蜀兵丙申安思謙屯右界漢兵屯寶雞思  
謙遣眉州刺史申貴將兵二千趣模壁設伏於竹林丁酉  
旦貴以兵數百壓寶雞而陳漢兵逐之遇伏而敗蜀兵  
遂北破寶雞寨蜀兵去漢兵復入寶雞己亥思謙進屯

渭水漢益兵五千戍寶雞思謙畏之謂衆曰糧少敵彊  
宜更為後圖辛丑退屯鳳州尋歸興元貴潞州人也

彰武節度使高允權與定難節度使李彝殷有隙李守  
貞密求援於彝殷發兵屯延丹境上聞官軍圍河中乃  
退甲辰允權以其狀聞彝殷亦自訴朝廷和解之初

沈丘人舒元嵩山道士楊訥俱以遊客干李守貞守貞  
為漢所攻遣元更姓朱訥更姓李名平間道奉表求救  
於唐唐諫議大夫查文徽兵部侍郎魏岑請出兵應之

唐主令北面行營招討使李金全將兵救河中以清淮  
節度使劉彥貞副之文徽為監軍使岑為汭淮巡檢使  
軍於沂州之境金全與諸將方會食候騎白有漢兵數  
百在澗北皆羸弱請掩之金全令曰敢言過澗者斬及  
暮伏兵四起金鼓聞十餘里金全曰鄉可與之戰乎時  
唐士卒厭兵莫有鬪志又河中道遠勢不相及十一月  
丙寅唐兵退保海州唐主遣帝書謝請復通商旅且請  
赦守貞朝廷不報王景崇累表告急於蜀蜀主命安

思謙再出兵救之十二月壬午思謙自興元引兵屯鳳州請先運糧四十萬斛乃可出境蜀主曰觀思謙之意安肯為朕進取然亦發興州興元米數萬斛以饋之戊子思謙進屯散關遣馬步使高彥儔眉州刺史申貴擊漢箭筈安都寨破之庚寅思謙敗漢兵於玉女潭漢兵退屯寶雞思謙進屯模壁韓保貞出新關壬辰軍於隴州神前漢兵不出保貞亦不敢進趙暉告急於郭威威自往赴之時李守貞遣副使周光遜裨將王繼勲聶知



遇守城西威戒白文珂劉詞曰賊苟不能突圍終為我擒萬一得出則吾不得復留於此成敗之機於是乎在賊之驍銳盡在城西我去必來突圍爾曹謹備之威至華州聞蜀兵食盡引去威乃還韓保貞聞安思謙去亦退保弓川寨

隱帝乾祐二年春正月郭威將至河中白文珂出迎之戊申夜李守貞遣王繼勳等引精兵千餘人循河而南襲漢柵坎岸而登遂入之縱火大譟軍中狼狽不知所

為劉詞神色自若下令曰小盜不足驚也帥眾擊之客  
省使閩晉卿曰賊甲皆黃紙為火所照易辨耳奈眾無  
鬪志何裨將李韜曰安有無事食君祿有急不死鬪者  
耶援稍先進眾從之河中兵退走死者七百人繼勲重  
傷僅以身免己酉郭威至劉詞迎馬首請罪威厚賞之  
曰吾所憂正在於此微兄健鬪幾為虜嗤然虜技殫於  
此矣晉卿忻州人也守貞之欲攻河西柵也先遣人出  
酤酒於村墅或貰與不責其直邏騎多醉由是河中兵

得潛行入寨幾至不守郭威乃下令將士非犒晏無得  
私飲愛將李審晨飲少酒威怒曰汝為吾帳下首違軍  
令何以齊衆立斬以徇 詔以靜州隸定難軍二月辛  
未李彝殷上表謝彝殷以中原多故有輕傲之志每藩  
鎮有叛者常陰助之邀其重賂朝廷知其事亦以恩澤  
羈縻之 夏四月河中城中食且盡民餓死者什五六  
癸卯李守貞出兵五千餘人齎梯橋分五道兵以攻長  
圍之西北隅郭威遣都監吳虔裕引兵橫擊之河中兵

敗走殺傷大半奪其攻具五月丙午守貞復出兵又敗之擒其將魏延朗鄭賓壬子周光遜王繼勳聶知遇帥其衆千餘人來降守貞將士降者相繼威乘其離散庚申督諸軍百道攻之趙思綰好食人肝嘗面剖而膾之膾盡人猶未死又好以酒吞人膽謂人曰吞此千枚則膽無敵矣及長安城中食盡取婦女幼稚為軍糧日計數而給之每犒軍輒屠數百人如羊豕法思綰計窮不知所出郭從義使人誘之初思綰少時求為左驍衛

上將軍致仕李肅僕肅不納曰是人目亂而語誕他日必為叛臣肅妻張氏全義之女也曰君今拒之後且為患乃厚以金帛遺之及思綰據長安肅閒居在城中思綰數就見之拜伏如故禮肅曰是子亟來且汙我欲自殺妻曰曷若勸之歸國會思綰問自全之計肅乃與判官程讓能說思綰曰公本與國家無嫌但懼罪耳今國家三道用兵俱未有功若以此時翻然改圖朝廷必喜自可不失富貴孰與坐而待斃乎思綰從之遣使詣闕

請降乙丑以思綰為華州留後都指揮使常彥卿為號

州刺史令便道之官 秋七月甲辰趙思綰釋甲出城

受詔郭從義以兵守其南門復遣還城思綰求其牙兵

及鎧仗從義亦給之思綰遷延收斂財賄三改行期從

義等疑之密白郭威請圖之威許之壬子從義與都監

南院宣徽使王峻按轡入城處於府舍召思綰酌別因

執之并常彥卿及其父兄部曲三百人皆斬於市 甲

寅郭威攻河中克其外郭李守貞收餘衆退保子城諸

將請急攻之威曰夫鳥窮則啄況一軍乎涸水取魚安  
用急為壬戌李守貞與妻及子崇勲等自焚威入城獲  
其子崇玉等及所署宰相靖姝孫愿樞密使劉芮國帥  
總倫等送大梁磔於市徵趙修已為翰林天文威閱守  
貞文書得朝廷權臣及藩鎮與守貞交通書詞意悖逆  
欲奏之祕書郎榆次王溥諫曰魑魅乘夜爭出見日自  
消願一切焚之以安反仄威從之 戊辰加永興節度  
使郭從義同平章事徙鎮國節度使扈彥珂為護國節

度使以河中行營馬步都虞候劉詞為鎮國節度使

八月戊戌郭威至大梁入見帝勞之賜金帛衣服玉帶  
駁馬辭曰臣受命期年僅克一城何功之有且臣將兵  
在外凡鎮安京師供億所須使兵食不乏皆諸大臣居  
中者之力也臣安敢獨膺此賜請徧賞之又議加鎮方  
鎮辭曰楊邠位在臣上未有茅土且帷幄之臣不可以  
弘肇為比九月壬寅徧賜宰相樞密宣徽三司侍衛使  
九人與威如一帝欲特賞威辭曰運籌建畫出於廟堂



發兵饋糧資於藩鎮暴露戰鬪在於將士而功獨歸臣  
臣何以堪之乙巳加威兼侍中史弘肇兼中書令辛亥  
加竇貞固司徒蘇逢吉司空蘇禹珪左僕射楊邠右僕  
射諸大臣議以朝廷執政溥加恩恐藩鎮觖望乙卯加  
天雄節度使高行周守太師山南東道節度使安審琦  
守太傅泰寧節度使符彥卿守太保河東節度使劉崇  
兼中書令己未加忠武節度使劉信天平節度使慕容  
彥超平盧節度使劉銖並兼侍中辛酉加朔方節度使

馮暉定難節度使李彝殷兼中書令冬十月壬申加義武節度使孫方簡武寧節度使劉贊同平章事壬午加吳越王弘俶尚書令楚王希廣太尉丙戌加荆南節度使高保融兼侍中議者以郭威不專有其功推以分人信為美矣而國家爵位以一人立功而覃及天下不亦濫乎 初邢州人周璨為諸衛將軍罷秩無依從王景崇西征景崇叛遂為謀主 趙暉急攻鳳翔周璨謂王景崇曰公向與蒲雍相表裏今二鎮已平蜀兒不足恃

不如降也景崇曰善吾更思之後數日外攻轉急景崇  
謂其黨曰事窮矣吾欲為急計乃謂其將公孫輦張思  
練曰趙暉精兵多在城北來日五鼓前爾二人燒城東  
門詐降勿令寇入吾與周璨以牙兵出北門突暉軍縱  
無成而死猶勝束手皆曰善癸巳未明輦思練燒東門  
請降府牙火亦發二將遣人訶之景崇已與家人自焚  
矣璨亦降

通鑑紀事本末卷四十二上

謹案卷四十二上第二頁前六行伊喇舊作拽刺

今改 十一頁後八行滿達舊作麻答今改後

仿此 二十一頁前八行穆蘭舊作沒刺今改

後仿此 二十九頁前二行轄哩舊作解里今

改後仿此 三十一頁後七行噶瑪哈舊作高


模翰今改後仿此 三十六頁前六行富珠哩

舊作傅住兒今改後仿此 四十五頁前二行

鄂約舊作兀欲今改後仿此 前三行隆和舊

作郎五今改後仿此 前四行耀尼舊作聿樵  
今改後仿此 後七行蘇葉舊作述軋今改後  
仿此





總校官庶吉士 臣 張能照

校對官編修 臣 莫瞻菴

膳錄監生 臣 和其聲